

**БАРААНЫ ТЭМДЭГ, ГАЗАР ЗҮЙН ЗААЛТЫН МЭДҮҮЛЭГ ГАРГАХ, ШҮҮЛТ ХИЙХ,
ТЭДГЭЭРИЙГ БҮРТГЭХ, УЛСЫН БҮРТГЭЛ ХӨТЛӨХ, ТЭДГЭЭРТ ӨӨРЧЛӨЛТ ОРУУЛАХ
ЖУРАМД НЭМЭЛТ ӨӨРЧЛӨЛТ ОРУУЛАХ ТУХАЙ**

1 дүгээр зүйл. Барааны тэмдэг, газар зүйн заалтын мэдүүлэг гаргах, шүүлт хийх, тэдгээрийг бүртгэх, улсын бүртгэл хөтлөх, тэдгээрт өөрчлөлт оруулах журамд доор дурдсан агуулгатай дараах зүйл, заалт нэмсүгэй:

1/1 дүгээр зүйлийн 1.2 дахь хэсгийн 1.2.5 заалт:

1.2.5.“бараа, бүтээгдэхүүн” гэж хөдөө аж ахуйн болон хөдөө аж ахуйн бус боловсруулаагүй болон боловсруулсан аливаа бараа бүтээгдэхүүн, гар урлал, аж үйлдвэрийн бараа бүтээгдэхүүнийг.

2/13, 14, 15 дугаар зүйл

АРВАН ГУРАВ. ГАЗАР ЗҮЙН ЗААЛТЫН МЭДҮҮЛЭГ ГАРГАХ

13.1. Мэдүүлэг гаргагч нь хуулийн 21.1-д заасан этгээд байна. Мэдүүлэг гаргагч нь Монгол Улсад албан ёсны оршин суух хаяггүй, тухайн улсын нутаг дэвсгэрт үйлдвэрлэл, үйлчилгээ эрхэлдэггүй гадаадын иргэн, хуулийн этгээд, харьяалалгүй этгээд мэдүүлгээ Оюуны өмчийн тухай хуулийн 16 дугаар зүйлд заасан оюуны өмчийн итгэмжлэгдсэн төлөөлөгчөөр төлөөлүүлэн гаргана.

13.2. Мэдүүлэг нь Журмын хавсралт “Маягт ГЗЗ-1”-аар гаргасан өргөдөл болон хуулийн 21.6-д заасан зүйлээс бүрдэнэ

13.3. Хуулийн 21.6.5-д заасан тодорхойлолтыг Журмын хавсралт “Маягт ГЗЗ-2”-ын дагуу бичнэ.

13.4. Мэдүүлгийг итгэмжлэгдсэн төлөөлөгчөөр төлөөлүүлэн гаргаж байгаа бол Журмын хавсралт хавсралт БТ-02-ын дагуу олгосон итгэмжлэлийг хавсаргана.

АРВАН ДӨРӨВ. ГАЗАР ЗҮЙН ЗААЛТЫН МЭДҮҮЛГИЙН БҮРДЛИЙГ ХЯНАХ

14.1. Бүртгэлийн мэргэжилтэн нь Аж үйлдвэрийн өмчийн цахим мэдээллийн санд холбогдох мэдээллийг оруулж, Журмын хавсралт “Маягт БТ-03” -ын дагуу өргөдөл хүлээн авсан тухай мэдэгдлийг цаасан эсхүл цахим хэлбэрээр мэдүүлэг гаргагчид илгээнэ.

14.2. Бүртгэлийн мэргэжилтэн нь тухайн газар зүйн заалтын мэдүүлгийг хүлээн авсан өдрөөс хойш хуулийн 23.1-д заасны дагуу ажлын 10 хоногийн дотор хуулийн 21, 22 дугаар зүйлд заасан бүрдлийн шалгуурыг хангаж байгаа эсэхийг шалгана.

14.3. Бүртгэлийн мэргэжилтэн мэдүүлгийн бүрдэл хангагдсан гэж үзвэл цахим мэдээллийн санд "бүрдэл хангагдсан" төлөвийг сонгож, цахим мэдээллийн сангаар дамжуулан нийтэд мэдээлнэ.

14.4. Бүртгэлийн мэргэжилтэн газар зүйн заалтын мэдүүлгийн бүрдэл хангаагүй гэж үзвэл журмын хавсралт “Маягт ГЗЗ-3” маягтын дагуу мэдэгдлийг үйлдэж, хуулийн 23.3-т заасны

дагуу мэдүүлэг гаргагчид хүргүүлнэ. Тухайн мэдэгдлийг мэдүүлэг гаргагчийн шуудангийн эсхүл цахим шуудангийн хаягаар илгээснээр, эсхүл цаасаар гардуулж өгснөөр мэдүүлэг гаргагчид мэдэгдсэнд тооцох ба мэдэгдсэн өдрөөс зохих засвар хийж ирүүлэх хугацаа тоологдож эхэлнэ.

14.5. Мэдүүлэг гаргагч нь хуулийн 23.4-т заасны дагуу ажлын 10 хоногийн дотор шаардлагатай засварыг хийж, бүртгэлийн мэргэжилтэнд хүргүүлнэ. Шуудангаар явуулах тохиолдолд заасан хугацаанд шуудангийн газарт өгнө.

14.6. Хуулийн 23 дугаар зүйлийн 23.4-т заасны дагуу бүртгэлийн мэргэжилтэн нь уг засварыг хангасан гэж үзвэл мэдүүлгийн анхдагч огноог мэдүүлгийг анх хүлээн авсан өдрөөр тогтоож, журмын 3.3, 3.4-т заасан үйл ажиллагааг тус тус гүйцэтгэнэ.

14.7. Мэдүүлэг гаргагч журмын 14.5-д заасан хугацаанд засварыг хийж ирүүлээгүй тохиолдолд бүртгэлийн мэргэжилтэн мэдүүлэг гаргагчийг мэдүүлгээсээ татгалзсанд тооцож, энэ тухай мэдэгдлийг журмын хавсралт “Маягт ГЗЗ-04”-ын дагуу үйлдэж, хуулийн 23.8-д заасны дагуу мэдүүлэг гаргагчид хүргүүлнэ.

14.8. Журмын 3.6-д заасны дагуу зохих засварыг шуудангаар илгээсэн бөгөөд хэрэв саатсан бол шуудангийн байгууллага дээр саатаж, улмаар хуулийн 23.5-д заасны дагуу мэдүүлгээсээ татгалзсан тухай мэдэгдэл гарсан бол, ийнхүү саатсаныг шуудангийн байгууллага нотолсон тохиолдолд бүртгэлийн мэргэжилтэн уг засварыг журмын 23.3-т заасан хугацаанд хийсэн гэж үзэж, журмын 14.3-т заасан үйл ажиллагааг гүйцэтгэнэ.

АРВАН ТАВ. ГАЗАР ЗҮЙН ЗААЛТЫН МЭДҮҮЛЭГТ ШҮҮЛТ ХИЙХ

15.1. Шинжээч хуулийн 24.1-д заасан шүүлтийг хийж, дүгнэлт гаргана.

15.2. Төрийн захиргааны байгууллага газар зүйн заалтын мэдүүлэгт шүүлт хийх, дүгнэлт гаргахдаа холбогдох чиглэлээр мэргэшсэн хөндлөнгийн мэргэжилтнээс зөвлөгөө авч болох ба шаардлагатай бол энэхүү зөвлөгөөг дүгнэлт гаргахдаа харгалзан үзэж болно.

15.3 Газар зүйн заалтын мэдүүлэгт шүүлт хийх, тэдгээрийг бүртгэх, улсын бүртгэл хөтлөх, тэдгээрт өөрчлөлт оруулахад Журмын холбогдох заалтыг баримтална.